

Sam'di lé treize dé Novembre et ch'r'est Brian Vibert dé St Ouen auve la Lettre Jèrriaise acouo eune fais. Et bein, nos v'chîn à la mié-Novembre auve seulement eune autre siêx s'maines d'avant Noué. Ch'n'est pon étonnant, donc, qué les jours raccourchissent à grands pas et qu'i' c'mmenche à faithe pus froid. Man grand-pèthe soulait dithe qué les blyâses dé Novembre apportent souvent eune froid mûcre tchi vos pâsse lé travers des os! Dé san temps, i' pâssaient les longues séthées coulés au pid du feu pour sé garder caud et j'sis arrivé à l'âge tchi m'donne grand pliaîsi dé m'fouôrrer l'sé dans ma grand' chaise près du feu.

Chutte sémaine, comme touos vous sans doute, j'ai acaté un p'tit pavot qué j'ai déjà épilé sus ma câsaque. Dans la preunmié dgèrre mondiale, ches p'tites rouôges flieuthes épanouissaient partout en Flandres et d'pis dgiêz-neuf chent vîngt-tch'ieune lé pavot artificiel a 'té fait et vendu comme symbole tchi nos ramémouaithe du sacrifice des cheins tchi fûtent tués ou tchi fûtent estropiés d'eune mannièthe ou autre dans les d'gèrres dépis. Et ch'est împortant dé nos en rapp'ler car i' faut tréjous êt' bein èrconnaissant ès cheins tchi s'bâtîtent pour prêsserver not' liberté et pour nos établyi dans un monde pus juste et paisibl'ye. N'oublions janmais qué l'histouaithe nos apprend qué j'profitons aniet dé chein qué nos anchêtres fitent hièr.

Et quand j'réalise l'împortance dé chenna, jé m'd'mande souvent “Tch'est qué nos d'scendants pens'sont dé nous et dé l'héthitage qué j'allons lus laîssi?” Demain i' profit'thont dé chein qué j'faisons aniet.

Ch'est tout bein d'êt' èrconnaissant pour lé pâssé, mais v'là tchi peut s'faithe tout simplément auve les lèvres sans prendre autcheune action. L'homme tch'est vraiment èrconnaissant cherche lé bein-être dé tous; i' s'fait d'la peine pour prêsserver tout tch'est bouôn et i' s'adonne à détruithe tout l'ma dans l'monde. Ch'est sa vie même, ses actions, la mannièthe tchi s'comporte envèrs d'autres tchi montrent la profondeu dé s'n èrconnaissance.

Mais j'nos trouvons aniet dans chutte époque dé l'histouaithe du monde, quand i' y'a un grand change dans l'clyînmat et ch'est eune affaithe urgente d'agi pour protégi et restaurer chein qué j'avons néglyigi et endommagi. Les r'présentants des difféthentes nâtions du monde tch'ont pâssé tchînze jours en Êcôsse ont dischuté et décidé comment agi mais ch'est à nous ichîn en Jèrri, comme gouvernement et îndividuellement, dé prendre responsabilité et d'agi sagement pour contribuer et éviter la catastrophe tchi nos attend. N'oublions pas qué nos d'scendants profit'thont dé chein qué j'faisons aniet.

En finissant, j'vos encouothage tous d'aller à vot' églyise ou vot' cénotaphe dé pâraisse demain matin, Dînmanche dé Ramémouaithe, pour prendre part dans l'sèrvice. Ch'est l'opportunité d'esprînmer not' gratitude pour lé sacrifice dé nos matelots, nos soudards, nos pilotes et tous tchi s'bâtîtent en dgèrre et d'èrmèrcier lé Bouôn Dgieu

pouor lé grand sacrifice dé Jêsû-Christ li-même.

À la préchainé!

J'espèthe qu'ous éthez tous eune bouônne sémaine.

Brian Vibert